

三  
國  
志  
注  
補

三國志注補卷五

仁和趙一清誤

魏書五

后妃傳第五

太祖建國始命王后其下五等有夫人有昭儀有婕妤有容華有美人

宋書樂志但歌四曲自漢世無弦節作伎最先一人倡三人  
和魏武帝尤好之時有宋容華者清徹好聲善倡此曲當時  
特妙

文帝增帝嬪淑媛修容順成良人

拾遺記魏文帝所愛美人薛靈芸常山人也父鄴爲鄼鄉亭

長母陳氏隨鄴舍於亭旁居生窮賤至夜每聚鄴鄰婦夜績以麻蒿自照靈芸年十五容貌絕世鄰中少年夜來竊窺終不得見咸熙元年谷習出守常山郡聞亭長有美女而家甚貧時文帝選良家子女以入六宮習以千金寶賂聘之以獻文帝靈芸聞別父母歔歔累日淚下霑衣至升車就路之時以玉唾壺盛淚壺則紅色及至京師壺中淚凝如血帝以文車十乘迎之車皆鏤金爲輪輞丹畫其轂輓前有雜寶爲龍鳳銜百子鈴鐸和鳴響於林野駕青色之牛日行三百里此牛尸塗國所獻足如馬蹄也道側燒石葉之香此石重疊狀如雲母其光氣辟惡厲之疾腹題國所獻也未至京師數十里膏燭之光相續不滅車徒咽路塵起蔽於星月時人謂爲

廡省又築土爲臺基高三十丈列燭於臺下名曰燭臺遠望如列星之墜地又於大道之旁一里一銅表高五尺以誌里數故行者歌曰青槐夾道多塵埃龍樓鳳闕望崔嵬清風細雨雜香來土上出金火照臺此七字是妖辭也未至京師十里帝乘雕玉之輦以望車徒之盛歎曰昔者言朝爲行雲暮爲行雨今非雲非雨非朝非暮改靈芸之名爲夜來入宮寵愛外國獻火珠龍鸞之釵帝曰明珠翡翠尙不能勝況乎龍鸞之重乃止不進夜來妙於鍼工雖處深帷之內不用鐙燭裁制立成非夜來縫製帝則不服宮中號爲針神

武宣卞皇后琅邪開陽人

方輿紀要卷三十三開陽城在沂州北十五里春秋時邾國

漢元和中爲琅邪國治

注以問卜者王旦

世說注作王越

太祖崩文帝卽王位尊后曰王太后

世說曰魏武帝崩文帝悉取武帝宮人自侍及帝病困卜后  
出看疾太后入戶見值侍並是昔日所愛幸者太后問何時  
來邪云正伏魄時過因不復前而歎曰狗鼠不食汝餘死故  
應爾至山陵亦竟不臨

注臣松之案文帝夢磨錢欲使文滅而更愈明以問周宣宣答  
曰此陛下家事雖意欲爾而太后不聽則太后用意不得如此  
書所言也

何云卞亦有權數若顯救植則外廷必有武姜叔段之義不以爲言而動以意或可爲耳

至太和四年春明帝乃追謚太后祖父廣曰開陽恭侯父遠曰敬侯祖母周封陽都君

續書郡國志琅邪陽都故屬城陽

秉薨子蘭嗣少有才學

隋書經籍志卞蘭集二卷錄一卷李善文選注引卞蘭許昌宮賦望舒涼室義和溫房困學紀聞引卞蘭座右銘曰求高反墜務厚更貧無謂幽冥處獨若羣不爲禍先不爲禍鄰爲奉車都尉游擊將軍

宋書百官志晉武帝以宗室外戚爲奉車駙馬郎都尉而奉

朝請焉後省奉車騎都尉唯畱駙馬都尉奉朝請永初以來  
尙主者拜駙馬都尉三都尉漢武帝置秩比二千石晉書職  
官志游擊將軍漢雜號將軍魏置爲中軍

文昭甄皇后中山無極人明帝母漢太休甄邯後也世吏二千  
石父逸上蔡令

世說注引魏略云甄會女寢宇記卷六十無極縣有後漢給  
事中甄逸墳續郡國志汝南郡上蔡本蔡國

注年九歲喜書視字輒識數用諸兄筆硯兄謂后言汝當習女  
工用書爲學當作女博士耶

炙轂子云塘上行一曰塘上辛苦行魏文帝甄后作

注魏略曰熙出在幽州后畱侍姑及鄴城破紹妻及后共坐室

堂上

室宋本作皇

注姑乃捧后令仰文帝就視見其顏色非凡稱歎之太祖聞其意遂爲迎取

世說曹公之屠鄴也令疾召甄左右白五官中郎將已將去公曰今年破賊正爲奴

踐阼之後山陽公奉二女以嬪於魏郭后李陰貴人並愛幸后愈失意有怨言帝大怒二年六月遣使賜死於鄴

李善文選洛神賦注引記曰魏東阿王漢末求甄逸女旣不遂太祖回與五官中郎將植殊不平晝思夜想廢寢與食黃初中入朝帝示植甄后玉鏤金帶枕植見之不覺泣時已爲



郭后讒死帝意亦尋悟因令太子留宴飲仍以枕資植植  
度輾轉少許時將息洛水上思甄后忽見女來自云我本託  
心君王其心不遂此枕是在我家時從嫁前與五官中郎將  
今與君王遂用薦枕席懽情交集豈常辭能具爲郭后以糠  
塞口今被髮羞將此形貌重觀君王爾言訖遂不復見所在  
遣人獻珠於王王荅以玉珮悲喜不能自勝遂作感甄賦後  
明帝見之改爲洛神賦

又別立寢廟

宋書禮志立寢廟於鄴至景初元年十二月己未有司又奏  
立廟京師永傳享祀樂舞與祖廟同廢鄴廟

注乃四海所以成化

成一作承

注是月三公又奏曰自古周人始祖后稷

宋書禮志始作歸

注今文昭皇后之於萬嗣

宋書禮志萬作後

注夫以皇家世祀之尊

宋書禮志祀作妃

太和元年三月以中山魏昌之安城鄉戶千追封逸

續郡國志中山國漢昌本苦陘章帝更名寰宇記卷六十漢昌魏文帝改爲魏昌故安城在祁州東南六里水經云安城卽魏昌之安鄉也魏志明帝封外祖甄逸爲安鄉侯卽此城

也

文昭廟宜世世享祀奏樂與祖廟同永著不毀之典以播聖善之風

宋書禮志高堂隆議魏文思后依周姜嫄廟禘祫卽此議也文思卽文昭又樂志侍中繆襲奏曰文昭皇后廟置四縣之樂當銘顯其均奏次第依太祖廟之名號曰昭廟之具樂尙書奏宜加襲議

又於其後園爲像母起觀廟名其里曰渭陽里以追思母氏也世說曰魏明帝爲外祖母築館於甄氏旣成自行視謂左右曰館當以何爲名侍中繆襲曰陛下聖思齊於哲王罔極過於冒閔之興情鍾舅氏宜以渭陽爲名劉孝標注云像母帝

之舅母非外祖母且渭陽爲館名亦乖舊史也

太和六年明帝愛女淑薨追封諡淑爲平原懿公主爲之立廟取后亡從孫黃與合葬

宋書禮志淑涉三月而天葬於南陵立廟京師無前典非禮也

注晉諸公贊曰惠字彥孫司馬景王輔政以女妻惠妻早亡文王復以女繼室卽京兆長公主景文二王欲自結於郭后是以頻繁爲婚

司馬鏡意纂魏至結宮中之援齊王之廢也奏中多列甄郭之名其容渭陽之情者如此嗚呼

文德郭皇后安平廣宗人也

續郡國志鉅鹿郡廣宗此云安平廣宗蓋曹氏改屬

注魏書曰父永官至南郡太守謚敬后母姓董氏卽堂陽君

后乃侯之謚續郡國志安平國堂陽故屬鉅鹿

遂敕諸家曰今世婦女少當配將士不得因緣取以爲妾也宜各自慎無爲罰首

何云此時當別有科禁今不可攷矣青龍中諸士女嫁非士者一切錄奪以配戰士亦當緣此爲辭耳

五年帝東征后畱許昌永始臺

文選何晏景福殿賦鎮以重臺實曰永始複閣重闈猖狂是俟京庾之儲無物不有不虞之戒於是焉取李善注永始臺名倉廩所居也

遷表昭德將軍加金紫

宋書百官志光祿大夫銀章青綬其重者加金章紫綬則謂之金紫光祿大夫一清案楊彪及齊王芳后父王夔只云加光祿大夫是銀章青綬者也此云加金紫是金紫光祿大夫不言光祿大夫史省文

注魏略曰明帝既嗣立追痛甄后之葬

葬字一本作薨是

注甄后臨沒以帝屬李夫人及太后崩夫人乃說甄后見譖之禍不獲大歛被髮覆面帝哀恨流涕命殯葬太后皆如甄后故事

何云郭太后歿其宗親恩禮無改故陳氏不取然毛后賜死

三國志卷之三  
曾猶遷官曹氏之酷虐變詐難以常禮推也

成爲新樂亭定侯

方輿紀要卷十四宋白曰漢武帝時中山王母馮昭儀隨王就國建宮於西鄉之樂里因呼爲西樂城俗僞爲新樂今定州之新樂縣也

初明帝爲王始納河內虞氏爲妃帝卽位虞氏不得立爲后太皇太后后慰勉焉虞氏曰曹氏自好立賤未有能以義舉者也然后職內事君聽外政其道相由而成苟不能以善始未有能令終者也殆必由此亡國喪祀矣虞氏遂紬還鄴宮

宋書五行志太和五年五月清商殿災初帝爲平原王納河內南虞氏爲妃及卽位不以爲后更立典虞車工卒毛嘉女是

爲悼皇后后本仄微非所宜升以妄爲妻之罰也

青龍三年嘉薨追贈光祿大夫改封安國侯

兩漢志中山國安國

賜后死然猶加謚葬愍陵

晉書安平獻王孚傳魏明悼后崩議書銘旌或欲去姓而書  
魏或欲兩書孚以爲經典正義皆不應書凡帝王皆因本國  
之名以爲天下之號而與往代相別耳非爲擇美名以自光  
也天稱皇天則帝稱皇帝地稱后土則后稱皇后此乃所以  
同天地之大號流無二之尊名不待稱國號以自表不俟稱  
氏族以自彰是以春秋隱公三年經曰三月庚戌天皇崩尊  
而稱不曰周王者所以殊乎列國之君也八月庚戌宋公和



卒書國稱名所以異乎天王也襄公十五年經曰劉夏逆王  
后於齊不曰逆周王后姜氏者所以異乎列國之夫人也至  
於列國則曰夫人姜氏至自齊又曰紀伯姬卒書國稱姓此  
所以異乎天王后也由此攷之尊稱皇帝赫赫無二何待於  
魏乎尊稱皇后彰以謚號何待於姓乎議者欲書魏者此以  
爲天皇之尊同於往古列國之君也或欲書姓者此以爲天  
皇之后同於往古之夫人也乖經典之大義異乎聖人之制  
非所以垂訓將來爲萬世不易之式者也遂從孚議

注魏略曰諸郭之中芝最壯直先時自以他功封爵

爵一本作侯

注惠及建俱爲鎮護將軍

鎮護將軍謂或爲領軍將軍或爲護軍將軍也然宋志魏世  
有中護軍及護軍無護軍將軍倘卽所謂資重者爲將軍者  
邪

宿松羅忠濟初校

黟縣黃士陵覆校

陽湖吳翊寅再覆校

三國志注補卷五

三國志注補卷六

仁和趙一清誤

魏書六

董卓二袁劉表傳第六

築郿塢高與長安城埒

後漢書卓傳築塢於郿高厚七丈號曰萬歲塢章懷注塢舊基高一丈周迴一里一百步

公卿已下祖道於橫門外

三輔黃圖長安北出西頭第一門曰橫門卽光門也

故太尉張溫時爲衛尉素不善卓卓心怨之因天有變欲以塞咎使人言溫與袁術交關遂笞殺之

後漢書卓傳溫字伯慎少有名譽累登公卿亦陰與司徒王允共謀誅卓未發而見害又竇武傳注引漢官儀曰溫穰人也封立鄉侯

悉椎破銅人鐘虞及壞五銖錢更鑄爲小錢大五分無文章肉好無輪郭不磨鑿

後漢書卓傳壞五銖錢更鑄小錢悉取洛陽及長安銅人鐘虞飛廉銅馬之屬以充鑄焉注引張璠記曰太史靈臺及永安侯銅蘭桶卓亦取之御覽卷七百十二引三輔故事卓壞銅人十枚爲小錢熨斗又洛陽伽藍記修梵寺北有永和里董卓之宅也里南北皆有池卓之所造水冬夏不竭里中邢鸞家常掘丹砂及錢數十萬銘云董太師之物後卓夜中隨

鸞索此物鸞不與之經年鸞卒

大會未央殿

方輿紀要卷五十三未央宮在西安府西南十八里長安故城西南隅蕭何起王莽改曰王路堂更始初被焚董卓劫遷車駕入長安復輯未央殿居之

布使同郡騎都尉李肅等將親兵十餘人僞著衛士服守掖門布懷詔書卓至肅等格卓卓驚呼布所在布曰有詔遂殺卓夷三族

後漢書卓傳注引九州春秋云布使秦誼陳衛李黑等僞作宮門衛士持長戟卓到宮門黑等以長戟挾义卓車或义其馬卓驚呼布布素施鎧甲於衣中持矛應聲刺卓墜於車

主簿田景

後漢書卓傳作田儀注引九州春秋作景

注英雄記曰時有謠言曰千里草何青青十日卜猶不生又作董逃之歌又有道士書布爲呂字以示卓卓不知其爲呂布也續五行志中平中京都歌曰承樂世董逃游四郭董逃蒙天恩董逃帶金紫董逃行謝恩董逃整車騎董逃垂欲發董逃與中辭董逃出西門董逃瞻宮殿董逃望京城董逃日夜絕董逃心摧傷董逃注引楊孚卓傳曰卓改爲董安引風俗通曰卓以董逃之歌主爲己發大禁絕之死者千數又御覽卷八百二十引華嶠後漢書曰有人書回字於布上負而行於市歌曰布乎布乎有告卓者卓不悟卷七百三十五引幽明

錄曰董卓信巫軍中嘗有巫都言禱求福利言從卓求布倉卒無布有手巾言曰可用耳便書布上如作兩口一口大口小相累以舉謂卓曰慎此也後爲呂布所殺後人乃知況呂布也

注身璜等及宗族老弱悉在郿皆還爲其羣下所斫射

後漢書卓傳使皇甫嵩攻卓弟粲於郿塢殺其母妻男女盡滅其族

諸阿附卓者皆下獄死注謝承漢書曰蔡邕在王允坐聞卓死有歎惜之音允責邕云云便使收付廷尉

後漢書邕傳曰董卓爲司空聞邕名高辟之稱疾不就卓大怒詈曰我力能族人蔡邕遂偃蹇者不旋踵矣切敕州郡舉

邕詣府邕不得已到署祭酒甚見敬重舉高第補侍御史轉  
侍書御史遷尚書三日之間周歷三臺遷巴郡太守復留爲  
侍中拜左中郎將封高陽鄉侯卓重邕才學厚相遇待每集  
譙輒令邕鼓琴贊事邕亦每存匡益然卓多自用邕恨其  
少從謂從弟谷曰董公性剛而遂非終難濟也吾欲東奔兗  
州若道遠難達且遯逃山東以待之何如谷曰君狀異恆人  
每行觀者盈集以此自匿不亦難乎邕乃止及卓被誅邕在  
王允坐殊不意言之而歎有動於色允勃然叱之卽收付廷  
尉治罪太尉馬日磾馳往謂允曰伯偕曠世逸才多識漢事  
當續成後史爲一代大典且忠孝素著而所坐無名無乃失  
人望乎允曰不可令佞臣執筆日磾退而告人曰王公其不



長世乎善人國之紀也制作國之典也滅紀廢典其能久乎  
邕遂死獄中時年六十一鄉立閭而歎曰漢世之事誰與正  
之魏書地形志陳畱郡小黃縣有蔡邕冢

分遣校尉李傕郭汜張濟略陳畱潁川諸縣

後漢書卓傳云擊破河南尹朱雋於中牟因略陳畱潁川諸  
縣

輔以爲皆叛乃取金寶獨與素所厚友胡赤兒等五六人相隨  
踰城北渡河赤兒等利其金寶斬首送長安

後漢書卓傳注引獻帝紀云輔帳下支胡赤兒等素待之過  
急盡以家寶與之自帶二十餘餅金大白珠璣胡謂輔曰城  
北已有馬可去也以繩繫輔腰踰城懸下之未及地丈許放

之輔傷腰不能行諸胡其取其金并珠斬首詣長安一清案  
支胡胡號也友字誤支字亦非

胡寅案支卽氏之誤古氏支同音月氏亦作月支可證趙氏

以爲胡號是也

用賈詡策遂將其眾而西所在收兵比至長安眾十餘萬

後漢書卓傳催汜等以王允呂布殺董卓故忿怒并州人并  
州人在軍中者男女數百皆殺之乃先遣使詣長安求乞赦  
免王允以爲一歲不可再赦不許之催等相謂曰京師不赦  
我我當以死決之若攻長安剋則得天下矣不剋則鈔三輔  
婦女財物西歸鄉里尚可延命於是帥軍西行王允遣卓故  
將胡軫徐榮擊之於新豐榮戰死軫以眾降

與卓故部曲樊稠李蒙王方等合圍長安城

後漢書卓傳注記袁宏記曰蒙爲催所殺

十日城陷

後漢書卓傳城峻不可攻守之八日呂布軍有叟兵內反引  
催眾得入注云叟兵卽蜀兵漢代謂蜀爲叟

注張璠漢紀曰布兵敗駐馬青瑣門外

三輔黃圖未央宮有青瑣門

注催汜入長安城屯南宮掖門殺太僕魯廋

後漢書魯恭傳長子謙謙子旭官至太僕與司徒王允謀誅  
董卓及李催入長安旭與允俱遇害一清案旭卽廋也字異  
耳

注司徒王允挾天子上宣平城門避兵

方輿紀要卷五十三長安東出北頭第一門曰宣平門亦曰東都門庾子山云望宣平之貴里言貴戚所居也

葬卓於郿大風暴雨震卓墓水流入藏漂其棺槨

後漢書卓傳注引獻帝起居注曰冢戶開大風暴雨水土流入杼出之棺向入輒復風雨水溢郭戶如此者三四冢中水半所稠等共下棺又風雨益暴甚遂閉戶戶閉大風復破其冢北齊書魏蘭根傳丁母憂將葬常山郡境先有董卓祠祠有柏樹蘭根以卓凶逆無道不應遺祠至今乃伐柏樹以爲槨材人或勸之不伐蘭根盡取之了無疑懼

催爲車騎將軍池陽侯領司隸校尉假節凡爲後將軍美陽侯稠爲右將軍萬年侯

後漢書卓傳注引袁山松書允謂催等曰臣無作威作福將軍放縱欲何爲乎催等不應自拜署催爲揚武將軍郭汜爲揚烈將軍樊稠等皆爲中郎將

催汜稠檀朝政英雄記曰催北地人汜張掖人一名多

後漢書卓傳注引劉艾獻帝紀催字稚然又卓傳云催加稠及郭汜開府與三公合爲六府皆參選舉注云獻帝起居注曰催等各欲用其所舉若一違之便忿憤恚怒主者患之乃以次第用其所舉先從催起汜次之稠次之三公所舉終不見用

濟爲驃騎將軍平陽侯

後漢書卓傳作鎮東將軍是也其後乃爲驃騎耳

以遂爲鎮西將軍遣還涼州騰征西將軍屯郿侍中馬宇與諫議大夫种邵左中郎將劉範等謀欲使騰襲長安已爲內應以誅宦等

後漢書种嵩傳嵩子拂字穎伯初平元年代荀爽爲司空以地震策免復爲太常李傕郭汜之亂長安城潰百官多避兵种拂揮劒而出曰爲國大臣不能止戈除暴致使凶賊兵刃向宮去欲何之遂戰而死子邵字仲甫爲侍中卓旣擅權而惡邵彊力遂左轉議郎出爲益涼二州刺史會父拂戰死竟不之職服終徵爲少府大鴻臚皆辭不受曰昔我先父以身殉國吾爲臣子不能除殘復怨何面目朝覲明主哉遂與馬騰韓遂及左中郎劉範諫議大夫馬宇共攻李傕郭汜以報

其讐與汜戰於長平，觀下軍敗邵等皆死。

宇等謀泄，出奔槐里，稠擊騰，騰敗走還涼州。又攻槐里，宇等皆死。

後漢書獻帝紀注云：前書音義曰：長平，陂名也。上有觀在池陽宮南，去長安五十里。今涇水南原畦城是也。袁宏記曰：是時馬騰以李傕等專亂，以益州刺史劉焉宗室大臣遣使招引，共誅傕焉。遣子範將兵就騰。故涼州刺史种邵太常拂之子也。拂爲傕所害，邵欲報仇，故爲此戰。又卓傳尚有中郎將杜稟注引獻帝紀曰：稟與賈詡有隙，脅扶風吏人爲騰守槐里，欲共攻傕。傕令樊稠及兄子利數萬人攻圍槐里，夜梯城，城陷，斬稟梟首。續郡國志：右扶風治槐里。周曰：犬邱，高帝改。

時三輔民尙數十萬戶催等放兵劫略攻剽城邑人民饑困二年間相啖食略盡

後漢書卓傳云時長安中盜賊不禁白日虜掠催汜稠乃參分城內各備其界猶不能制而其子弟縱橫侵暴百姓獻帝紀云是歲穀一斛五十萬豆麥一斛二十萬人相食啖白骨委積帝使侍御史侯汶出太倉米豆爲飢人作糜粥終日而死者無數帝疑賦卹有虛乃親於御坐前量試作糜乃知非實使侍中劉艾出讓有司於是尙書令以下皆詣省閣謝奏收侯汶攷實詔曰未忍致汶於理可杖五十自是之後多得全濟注引袁宏紀曰時敕侍中劉艾取米豆五升於御前作糜得滿三孟於是詔尙書曰米豆五升得糜三孟而人委頓



何也

注九州春秋曰馬騰韓遂之敗樊稠追至陳倉遂語稠曰天地反覆

天地後漢書卓傳作天下

注催以是疑稠與韓遂私和而有異意稠欲將兵東出關從催索益兵因請稠會議便於坐殺稠

後漢書卓傳引獻帝紀催見稠果勇而得眾心疾害之醉酒潛使外生騎都尉胡封於坐中拉殺稠

注獻帝起居注曰初汜謀迎天子幸其營

後漢書卓傳安西將軍楊定者故卓部曲將也懼催忍害乃與汜合謀迎天子幸其營

注催使兄子暹將數千兵圍宮以車三乘迎天子楊彪曰自古帝王無在人臣家者舉事當合天下心諸君作此非是也暹曰將軍計定矣於是天子一乘貴人伏氏一乘賈詡左靈一乘其餘皆步從是日催復移乘輿幸北塢

後漢書獻帝紀興平二年三月丙寅李催脅帝幸其營夏四月甲午立貴人伏氏爲皇后丁酉郭汜攻李催矢及御前是日李催移帝幸北塢則幸催營與幸北塢不同日也又注引山陽公載記曰時帝在南塢流矢中催左耳乃迎帝幸北塢帝不肯從置之乃行又卓傳注引獻帝紀曰汜與催將張苞張龍謀誅催汜將兵夜攻催門候開門納汜兵苞等燒屋火不然汜兵弓弩並發矢及天子樓帷簾中

注初催屯黃白城

方輿紀要卷五十三黃白城在西安三原縣西南二十里水經渭水注秦曲梁宮也後爲黃白城

注催以司徒趙溫不與己同

後漢書趙典傳溫字子柔

注催大怒欲遣人害溫其從弟應溫故掾也

趙典傳作董卓從弟應蓋范史之疏

注華嶠漢書曰汜舉公卿議欲攻催楊彪曰羣臣共鬪一人劫天子一人質公卿此可行乎汜怒欲手刃之中郎將楊密及左右多諫汜乃歸之

後漢書卓傳汜欲手刃彪彪曰卿尙不奉國家吾豈求生邪

注天子以謁者僕射皇甫郛

郛是嵩之從子

注曰我有呂布之功

冊府元龜呂上有討字

注外有董昱承璜以爲鯁毒

卓弟昱兄子璜此云昱承璜豈謂董承邪承是河間人不與卓同郡望蓋因與卓同姓故遂及之卓傳云李傕以故牛輔部曲董承爲安集將軍則是時承實在行間也

注天子使左中郎將李固持節拜傕爲大司馬

李固後漢書卓傳注引獻帝紀作李國

傕將楊奉與傕軍吏宋果等謀殺傕事泄遂將兵叛傕傕眾叛

稍衰弱張濟自陝和解之天子乃得出至新豐霸陵間

後漢書楊震傳長子牧牧孫倚爲侍中衛尉李傕脅帝歸其營奇與黃門侍郎鍾繇誘傕部曲將宋暉楊昂令反傕傕由此孤弱帝乃得東卓傳張濟欲遷帝權幸弘農帝亦思舊京因遣使敦請傕求東歸十反乃許車駕卽日發邁注引袁宏紀曰濟從太官令孫篤校尉張式宣諭十反

注獻帝起居注曰初天子出到宣平門當度橋

水經渭水注霸水又北逕枳道在長安縣東十三里水上有橋謂之霸橋

崔汜悔遣天子復相與和追及天子於弘農之曹陽

後漢書獻帝紀注曹陽澗名在今陝西南七里俗謂之七里

澗

奉急招河東故白波帥韓暹胡才李樂等合與催汜大戰奉兵敗催等縱兵殺公卿百官略宮人入弘農

後漢書獻帝紀催汜等追乘輿戰於東澗王師敗績殺光祿勳鄧泉衛尉士孫瑞廷尉宣播大長秋苗祀步兵校尉魏桀侍中朱展射聲校尉沮鵠楊奉董承引白波帥胡才李樂韓暹及匈奴右賢王去卑率師奉迎與李催等戰破之車駕乃進催等復來追戰王師大敗殺略宮人少府田芬大司農張義皆戰歿又卓傳張濟合催汜追乘輿大戰於弘農東澗承奉軍敗百官士卒死者不可勝數皆棄其婦女輜重御物符策典籍略無所遺射聲校尉沮鵠被創墜馬李催謂左右曰

尚可活不雋罵之曰汝等凶逆逼迫天子亂臣賊子未有如  
汝者催使殺之承奉密遣使招白波帥李樂韓暹胡才及南  
匈奴右賢王去卑並率眾來與承奉擊催等大破之乘輿乃  
得進催等復來戰奉等大敗死者甚於東澗一清案此所敘  
似誤合兩戰爲一事

注獻帝紀曰時尚書令士孫瑞爲亂兵所害三輔決錄注曰瑞  
字君榮扶風人世爲學門瑞少傳家業博達無所不通仕歷顯  
位卓既誅遷大司農爲國三老每三公缺瑞常在選中

後漢書王允傳瑞以允自專討董卓之勞故歸功不侯所以  
獲免於難

注天子都許追論瑞功封子萌澹津亭侯

後漢書卓傳注引三輔決錄云萌封車亭侯

天子走北陝渡河失輜重步行唯皇后貴人從

後漢書卓傳是宋貴人注引獻帝起居注云貴人名都常山  
太守泓之女也

注劉艾曰臣前爲陝令知其危險有師猶有傾覆

後漢書卓傳注作舊故河師猶時有傾覆

注時中宮僕伏德扶中宮一手持十疋絹乃取德絹連續爲輦  
後漢書伏皇后手持縑數匹董承使符節令孫徽以刃脅之  
殺傷侍者血濺后衣既至安邑御服穿敝唯棗栗爲糧  
奉還承乃以天子還洛陽出箕關下軹道

水經河水注漾水出垣縣王屋西山漾溪夾山東南流逕故



城東卽潞關也獻帝自陝北渡安邑東出潞關卽是關也方  
輿紀要卷四十一箕關在山西絳州垣曲縣東北七十里又  
卷四十九河南懷慶府濟源縣南十三里有軹城卽軹道也  
張揚以食迎道路拜大司馬語在揚傳天子入洛陽

後漢書卓傳建安元年春諸將爭權韓暹遂攻董卓承奔張  
楊楊乃使承先繕修洛宮七月帝還至洛陽注引袁宏記誅  
議郎侯祈尙書馮碩侍中壺崇討有罪也封衛將軍董卓輔  
國將軍伏完侍中丁冲种輯尙書僕射鍾繇尙書郭曄御史  
中丞董芬彭城相劉艾馮翊韓斌東郡太守楊眾議郎羅邵  
伏德趙粦爲列侯賞有功也贈射聲校尉沮儁爲弘農太守  
旌死節也

建安二年遣謁者僕射裴茂率關西諸將誅傿夷三族

後漢書獻帝紀建安三年夏四月遣謁者裴茂率中郎將段煨討李傿夷三族卓傳以段煨爲安南將軍封鄉侯一清案南字誤當作西

汜爲其將五習所襲

後漢書卓傳作伍習

注明帝時爲楚郡太守

續郡國志注彭城國高祖置爲楚章帝改

注京子陽太尉陽四子

據後漢書袁安袁紹傳陽當作湯

以大將軍掾爲侍御史

後漢書紹傳辟大將軍何進掾爲侍御史虎賁中郎將  
弱冠除濮陽長

後漢書許劭傳同郡袁紹公族豪俠去濮陽令歸車徒甚盛  
將入郡界乃謝遣賓客曰吾輿服豈可使許子將見遂以單  
車歸家

乃召董卓欲以脅太后

何云紹勸進召董卓爲謀不臧漢室破壞而袁宗先受其殃  
天下之罪魁也

時紹勸進便可於此決之至於再三而進不許

何云進意旣同紹爲司隸乘讓忠之出選爪牙武吏執取渠  
魁盡之於獄反掌可以集事徒見王甫旣誅陽球旋亦受禍

欲措其身於萬全之地惟望進之早斷不敢自使百

選溫厚虎賁二百人

楊子方言燕齊之間養馬者謂之娠郭注今之溫厚也

中常侍段珪等矯太后命召進入議遂殺之宮中亂

後漢書何進傳進與紹定籌策而以其計白太后太后不聽  
曰中官統領禁省自古及今漢家故事不可廢也且先帝新  
棄天下我奈何楚楚與士人共對事乎進難違太后意而太  
后母舞陽君及苗數受諸宦官賂遺知進欲誅之數白太后  
爲其障蔽中官在省闕者或數十年封侯貴寵膠固內外進  
新當重任素敬憚之雖外收大名而內不能斷故事久不決  
紹又爲畫策多召四方猛將及諸豪傑使並引兵向京城以

脅太后進然之遂召董卓屯上林苑橋瑁屯城皋使丁原燒  
孟津火照城中皆以誅宦官爲言太后猶不從進於是以紹  
爲司隸校尉假節專命擊斷從事中郎王允爲河南尹紹使  
洛陽令方略武吏司察宦者而促董卓等使馳驛上欲進兵  
平樂觀太后乃恐悉罷中常侍小黃門使還里舍唯畱進素  
所私人以守省中諸常侍小黃門皆詣進謝罪進謂曰天下  
匈匈正患諸君耳今董卓隨至諸君何不早各就國袁紹勸  
進便於此決之進不許紹又爲書告州郡詐宣進意使捕案  
中官親屬進謀積日頗泄中官懼而思變張讓子婦太后之  
甥也讓向子婦叩頭曰老臣得罪當與新婦俱歸私門唯受  
恩累世今當遠離宮殿情懷戀戀願復一入直得暫奉望太

后陛下顏色然後退就溝壑死不恨矣子婦言於舞陽君入  
白太后乃詔諸常侍皆復入直進入長樂白太后請盡誅諸  
常侍以下選三署郎入守宦官廬張讓等使人潛聽具聞其  
語乃率常侍段珪畢嵐等數十人持兵竊自側闥入伏省中  
及進出因詐以太后詔召進入坐省闕讓等詰進曰天下憤  
憤亦非獨我曹罪也今乃欲滅我曹種族不亦太甚乎卿言  
省內穢濁公卿以下忠清者爲誰於是尙方監渠穆拔劔斬  
進於嘉德殿前讓珪等爲詔以故太尉樊陵爲司隸校尉少  
府許相爲河南尹尙書得詔板疑之曰請太將軍出共議中  
黃門以進頭擲與尙書曰何進謀反已伏誅矣

術將虎賁燒南宮嘉德殿青瑣門欲以迫出珪等珪等不出劫

帝及帝弟陳畱王走小平津紹旣斬宦者所署司隸校尉許相遂勒兵捕諸閹人無少長皆殺之

後漢書進傳進部曲將吳匡張璋素所親幸在外聞進被害欲將兵入宮宮閣閉袁術與匡共斫攻之中黃門持兵守閣會日暮術因燒南宮九龍門及東西宮欲以脅出讓等讓等入白太后言大將軍兵反燒宮攻尙書闕因將太后天子及陳畱王又劫省內官屬從複道走北宮尙書盧植執戈於閣道窗下仰數段珪段珪等懼乃釋太后太后投閣得免袁紹與叔父隗矯詔召樊陵許相斬之苗紹乃引兵屯朱雀關下捕得趙忠等斬之遂閉北宮勒兵捕宦者

董卓呼紹議欲廢帝立陳畱王是時紹叔父隗爲太傅紹僞許

之曰此大事出當與太傅議卓曰劉氏種不足復遺紹不應橫  
刀長揖而去

後漢書紹傳云懸節於上東門注云洛陽城東北面頭門也  
山陽公載記曰卓以袁紹棄節改第一抹爲赤旄續百官志  
符節令注引魏氏春秋曰中平六年始復節上赤抹又紹傳  
注引英雄記曰紹揖卓去坐中驚愕卓新至見紹大家故不  
敢害一清案續百官志注引蔡質漢儀曰司隸校尉每會後  
到先去紹時爲司隸故用此儀徑去

注獻帝春秋曰卓欲廢帝謂紹曰皇帝冲闇非萬機之主

何云機一本作乘

乃拜紹勃海太守封邳鄉侯



後漢書紹傳云紹猶稱兼司隸注引山陽公載記曰董卓以紹爲前將軍封邳鄉侯紹受侯不受前將軍又注云前書潁川有周承休侯國元帝置元始二年更名邾

紹自號車騎將軍主盟與冀州牧韓馥立幽州牧劉虞爲帝遣使奉章詣虞虞不敢受

何云紹此舉更誤方起兵討卓以廢弑少帝爲辭乃欲尊立疏宗蹈其覆轍其後終以獻帝君臣之好不固狐疑未卽奉迎曹操先之使號令爲他人所假不戰而成敗異勢矣

紹還軍延津因馥惶遽使陳畱高幹潁川荀諝等說馥曰公孫瓚乘勝來向南而諸郡應之袁車騎引軍東向此其意不可知竊爲將軍危之

後漢書臧洪傳注引英雄記爲紹說馥讓州者尙有張景明郭公則二人公則疑是郭圖字景明名導見水經注又紹傳云馥見人情歸紹忌方得眾恐將圖已常遣從事守紹門不聽發兵每貶節軍糧欲使離散馥將麴義反畔馥與戰失利紹既恨馥乃與義相結

馥長史耿武別駕閔純治中李歷諫馥曰

後漢書紹傳注引英雄記曰耿武字文威閔純字伯典後袁紹至馥從事十人棄馥去惟恐在後獨武純杖刀拒兵不能禁紹後令田豐殺此二人

從事趙浮程奐請以兵拒之馥又不聽乃讓紹

後漢書趙傳云馥讓紹紹承制以馥爲奮威將軍而無所將

御

注時紹尙在朝歌清水口

寰宇記卷五十六清水與淇水合東入白溝淇口水出共山東至衛縣西一里過又南流二十三里與清水合入河謂之淇水口

注浮等從後來船數百艘眾萬餘人整兵鼓夜過紹營

後漢書紹傳注引英雄記鼓上有駭字

注袁本初軍無斗糧各已離散

英雄記已作欲

注明將軍但當開閣高枕

英雄記開閣作閉戶

三國志卷之六  
七  
紹遂領冀州牧從事沮授說紹曰

後漢書紹傳云紹引沮授爲別駕因謂授曰今賊臣作亂朝廷遷移吾歷世受寵志竭力命興復漢室然齊桓非夷吾不能成霸句踐非范蠡不能存國今欲與卿戮力同心共安社稷將何以匡濟之乎

卽表授爲監軍奮威將軍

後漢書紹傳作奮武將軍是也時以劉瓚爲奮威將軍不得回授沮生也

卓遣執金吾胡母班將作大匠吳修齋詔書喻紹紹使河內太守王匡殺之

後漢書紹傳云卓遣大鴻臚韓融少府陰循執金吾胡母班

將作大匠吳循越騎校尉王瓊譬解紹等諸軍紹使王匡殺班瓊吳循等袁術亦執殺陰循惟韓融以名德免注引海內先賢傳曰韓融字元長潁川人楚國先賢傳曰陰循字元基南陽新野人一清案循脩二字古多以形近相亂

注漢末名士錄曰班字季皮

後漢書紹傳注引漢末名士錄作季友案友字誤也

注亡人子二人則君之甥

後漢書紹傳注引謝書云亡人二女則君之甥

卓聞紹得關東乃悉誅紹宗族太傅隗等

後漢書獻帝紀初平元年三月戊午董卓殺太傅袁隗太僕袁基夷其族注云隗紹之叔父基袁術之母兄獻帝春秋曰

尺口以上男女五十餘人皆下獄死又紹傳注引卓別傳曰  
悉埋青城門外東都門內而加書焉又恐有盜取者復以尸  
送郿藏之

馥在坐上謂見圖構無何起至溷自殺

後漢書紹傳注引九州春秋曰以書刀自殺

注紹自往征瓚合戰於界橋南二十里

後漢書紹傳注云今貝州宗城縣東有古界城此城近枯潦  
水則界橋當在此之側也方輿紀要卷十五界橋在北直順  
德府廣宗縣東一名袁公橋亦曰界城橋

注遂到瓚營拔其牙門

後漢書紹傳注云真人水鏡經曰凡軍始出立牙竿必令完

堅若有折將軍不利牙門旗竿軍之精也卽周禮司常職云  
軍旅會同置旌門是也

注紹旣破瓚引軍南到薄落津

續郡國志安平國經西有漳水津名薄落津後漢書紹傳云  
三月上巳大會賓徒於薄落津注引酈元水經注漳水經鉅  
鹿故城西謂之薄落津續漢志廩陶縣有薄落亭

注皆憂怖失色或以啼泣

以字一本作起是也後漢書紹傳云或起而啼泣

注賊陶升者故內黃小吏也

續郡國志魏郡內黃後漢書紹傳云升自號平漢將軍

注送到斥邱

續郡國志魏郡斥邱後漢書紹傳注故城在今相州成安縣東南

注乃引軍入朝歌鹿場山蒼巖谷討于毒

續郡國志朝歌有鹿腹山後漢書紹傳作鹿腸山注引續志同又水經清水注清水東與倉水合水出西北方山上方山在衛縣西有倉谷谷有倉玉珉石故名焉

注遂尋山北行薄擊諸賊左髻丈八等皆斬之

後漢書紹傳作左髻丈八等

注授曰今迎朝廷至義也又於時宜大計也若不早圖必有先人者也夫權不失機功在速捷將軍其圖之紹弗能用案此書稱郭圖之計則與本傳違也



前載沮授說紹有迎大駕於西京復宗廟於洛邑之語則奉迎漢帝本沮生之謀竊謂獻帝傳所言爲審後漢書紹傳云興平二年拜紹右將軍

會太祖迎天子都許收河南地關中皆附紹悔欲令太祖徙天子都鄆城以自密近太祖拒之天子以紹爲太尉轉爲大將軍封鄆侯

後漢書紹傳建安元年曹操迎天子都許乃下詔書於紹責以地廣兵多而專自樹黨不聞勤王之師而但擅相討伐紹上書曰臣聞昔有哀歎而霜隕悲哭而崩城者每讀其書謂爲信然於今況之乃知妄作何者臣出身爲國破家立事至乃懷忠獲譴抱信見疑晝夜長吟剖肝泣血曾無崩城隕霜

三國志卷之六  
三  
之應故鄒衍杞婦何能感徹臣以負薪之資拔於陪隸之中  
奉職憲臺擢授戎校常侍張讓等滔亂天常侵奪朝威賊害  
忠德扇動奸黨故大將軍何進忠國疾亂義心赫怒以臣頗  
有一介之節可責以鷹犬之功故授臣以督司詔臣以方略  
臣不敢畏憚彊禦避禍求福與進合圖事無違異忠策未盡  
而元帥受敗太后被質宮室焚燒陛下聖德効冲親遭厄困  
時進既被害師徒喪沮臣獨將家兵百餘人拙戈承明竦劍  
翼室虎叱羣司奮擊凶醜曾不浹辰罪人斯殄此誠愚臣效  
命之一驗也會董卓承虛所圖不軌臣父兄親從並當大位  
不憚一室之禍苟惟寧國之義故遂解節出奔創謀河外時  
卓方貪結外援招悅英豪故卽臣勃海申以軍號則臣之與卓

未有纖芥之嫌若使苟欲滑泥揚波偷策求利則進可以享  
竊祿位退無門戶之患然臣愚所守志無傾奪故遂引會英  
雄興師百萬飲馬孟津歃血漳河會故冀州牧韓馥懷挾逆  
謀欲專權勢絕臣軍糧不得踵係至使猾虜肆毒害及一門  
尊卑大小同日並戮鳥獸之情猶知號呼臣所以蕩然忘哀  
貌無隱戚者誠以忠孝之節道不兩立顧私懷已不能全功  
斯亦愚臣破家徇國之二驗也又黃巾十萬焚燒青兗黑山  
張揚蹈藉冀域臣乃旋師奉辭伐畔金鼓未震狡敵知亡救  
韓馥懷懼謝咎歸土張揚黑山同時乞降臣時輒承制竊比  
竇融以議郎曹操權領兗州牧會公孫瓚師旅南馳陸掠北  
境臣卽星駕席卷與瓚交鋒假天之威每戰輒克臣備公

族子弟生長京輦頗聞俎豆不習干戈加自乃祖先臣以來  
世作輔弼咸以文德盡忠得免罪戾非與瓚角戎馬之勢爭  
戰陳之功者也誠以賊臣不誅春秋所貶苟云利國專之不  
疑故冒踐霜雪不憚劬勤實庶一捷之福以立終身之功社  
稷未定臣誠恥之太僕趙岐銜命來征宣陛下含弘之施蠲  
除細故與下更新奉詔之日引師南轅是臣畏怖天威不敢  
怠慢之三驗也又臣所上將校率皆清英宿德令名顯達登  
鋒履刃死者過半勤恪之功不見書列而州郡牧守競盜聲  
名懷持二端優游顧望皆列土賜圭跨州連郡是以遠近狐  
疑議論紛錯者也臣聞守文之世德高者位尊倉卒之時功  
多者賞厚陛下播越非所洛邑乏祀海內傷心志士憤惋是

以忠臣肝腦塗地肌膚橫分而無悔心者義之所感故也今  
賞加無勞以攜有德杜黜忠功以疑眾望斯豈腹心之遠圖  
將乃讒慝之邪說使之然也臣爵爲通侯位二千石殊恩厚  
德臣旣叨之豈敢闕覲重禮以希彤弓旅矢之命哉誠傷偏  
裨別校勤不見紀盡心爲國翻成重愆斯蒙恬所以悲號於  
邊獄白起獻歆於杜郵也太傅曰殫位爲師保任配東征而  
耗亂王命寵任非所凡所舉用皆眾所捐棄而容納其策以  
爲謀主令臣骨肉兄弟還爲仇敵交鋒接刃構難滋甚臣雖  
欲釋甲投戈事不得已誠恐陛下日月之明有所不照四聰  
之聽有所不聞乞下臣章咨之羣賢使三槐九棘議臣罪戾  
若以臣今行權爲釁則桓文當有誅絕之刑若以眾不討賊

爲賢則趙盾可無書弑之貶矣臣雖小人志守一介若使得申明本心不愧先帝則伏首歐刀褰衣就鑊臣之願也惟陛下垂尸鳩之平絕邪諂之論無令愚臣結恨三泉於是以紹爲太尉封鄴侯時曹操自爲大將軍紹恥爲之下僞表辭不受操大懼乃讓位於紹二年使將作大匠孔融持節拜紹大將軍錫弓矢節鉞虎賁百人兼督冀青幽并四州然後受之紹每得詔書患有不便於己乃欲移天子自近使說操以許下埤涇洛陽殘破宜徙都鄆城以就全實操拒之田豐說紹曰徙都之計旣不克從宜早圖許奉迎天子動託詔令響號海內此算之上者不爾終爲人所禽雖悔無益也紹不從

注典略曰自此紹貢御希慢私使主簿耿苞密白曰赤德衰盡

袁爲黃盾宜順天意

後漢書紹傳苞作包又後漢書紹傳注引獻帝春秋曰袁舜後黃應代赤故苞有此言

注九州春秋曰紹延徵北海鄭玄而不禮

後漢書鄭玄傳袁紹總兵冀州遣使要玄大會賓客玄最後至乃延升上坐身長八尺飲酒一斛秀眉明目容儀溫偉紹客乃多豪傑並有才說見玄儒者未以通人許之競設異端百家互起玄依方辯對咸出問表皆得所未聞莫不嗟服時汝南應劭亦歸於紹因自贊曰故太山太守應中遠北面稱弟子何如玄笑曰仲尼之門攷以四科回賜之徒不稱官閥劭有慚色紹乃舉玄茂才表爲左中郎將皆不就公車徵爲

大司農給安車一乘所過長吏送迎玄乃以病自乞還家有頃寢疾時袁紹與曹操相拒於官渡令其子譚遣使逼玄隨軍不得已載病到元城縣疾篤不進卒年七十四寰宇記卷二十四鄭玄墓在高密縣西北十里玄此縣人也高士傳曰玄卒葬於劇東後以墓壞歸葬礪阜礪阜在高密城西北五里唐貞觀十一年詔去墓四十步禁樵采焉

注紹曰孤欲令四兒各據一州

紹三子譚尙熙連外生高幹數之故云四兒

注監軍之計計在持牢

後漢書紹傳監軍作將軍

建安五年大祖自東征備田豐說紹襲太祖後



後漢書紹傳田豐說紹曰與公爭天下者曹操也操今東擊劉備兵連未可卒解今舉軍而襲其後可一往而定兵以機動斯其時也

豐舉杖擊地曰夫遭難遇之機而以嬰兒之病失其會惜哉後漢書紹傳云紹聞而怒之從此遂疏焉何云若用田豐之言即使許不可拔而紹據臨大河以爭其北徐州出兵擾其東南過於彭越之在梁地操奔命不暇矣

注魏氏春秋載紹檄州郡文曰蓋聞明主圖危以制變忠臣慮難以立權

文選此下云是以有非常之人然後有非常之事有非常之事然後立非常之功夫非常者故非常人所擬也後漢書紹

傳及此並刪之

注曩者彊秦弱主趙高執柄專制朝命威福由己終有望夷之禍汗辱至今

文選命作權由己下有時人迫脅莫敢正言二語望夷之禍禍作敗句下有祖宗焚滅四字汗辱至今下有永爲世鑒四字

注及臻呂后祿產專政

文選呂后有季年二字專政下有內兼二軍外統梁趙二語

注誅夷逆亂

後漢書紹傳及文選亂作暴

注故能道化興隆光明顯融

文選道化作王道後漢書紹傳顯融作融顯

注方收羅英雄棄瑕錄用故遂與操參咨策略

文選無方字錄作取參咨策略作同諮合謀下有授以裨師四字

注表行東郡太守兗州刺史被以虎文授以偏師獎賊威柄

文選無太守二字兗州上有領字無授以偏師句又李善注賊成也紹傳作獎就

注身被梟縣之戮

文選身下有首字當增

注故復援旌擐甲席卷赴征

李善云紹征呂布諸史不載蓋史略也

注後會鑿駕東反羣虜亂政

文選東反作反旆亂政作寇攻

注而便放志專行脅遷省禁卑侮王宮

文選作操反放志專行脅遷當御省禁卑侮王室後漢書紹傳作威劫省禁卑侮王僚

注敗法亂紀坐召三臺

文選作坐領後漢書紹傳注引應劭漢官儀曰尚書爲中臺御史爲憲臺謁者爲外臺

注羣談者蒙顯誅

蒙字後漢書紹傳及文選皆作受字是也

注故太尉楊彪歷典三司

彪爲司空司徒故曰二司三字誤也

注操因睚眦被以非罪

文選因下有緣字

注操欲迷奪時權

後漢書紹傳及文選權作明是也

注又梁孝王先帝母弟墳陵尊顯松栢桑梓猶宜恭肅而操率將校吏士親臨發掘破棺裸尸略取金寶至今聖朝流涕士民傷懷

何云此事不知信否文選注曹瞞傳云曹操破梁孝王棺收金寶天子聞之哀泣似緣此檄而實之

注往歲伐鼓北征討公孫瓚彊禦桀逆

文選無討字禦作寇

注故引兵造河方舟北濟會其行人發露瓚亦梟夷故使鋒芒坐縮厥圖不果

後漢書紹傳注引獻帝春秋曰操引軍造河北言助紹圖襲鄴以爲瓚援會瓚破滅紹亦覺之以軍退屯守敖倉坐字乃挫之誘厥圖不果下文選有爾乃大軍過蕩西山屠各左校皆束手奉質爭爲前登犬羊殘醜消淪山谷於是操師震懾晨夜逋遁八語

注奮中黃育獲之材

文選注尸子中黃伯余左執太行之優而右搏彫虎

注并州越太行青州涉濟漯大軍汎黃行以角其前荊州下宛葉而倚其後

後漢書紹傳文選注并州紹甥高幹青州紹長子譚荊州劉表表與紹交故云下宛葉

注有何不消滅者哉

文選無消字此句下有云又操軍吏士其可戰者皆出自幽冀或故營部曲咸怨曠思歸流涕北顧其餘兗豫之民及呂布張揚之遺眾覆亡迫脅權時苟從各被創夷人爲讐敵若迴旆方徂登高岡而擊鼓吹揚素麾以啟降路必土崩瓦解不俟血刃

注當今漢道陵遲綱弛紀絕

文選此下有云聖朝無一介之輔股肱無折衝之勢方畿之內簡練之臣皆垂頭搢翼莫所憑恃雖有忠義之佐脅於暴虐之臣焉能展其節

注乃忠臣用腦塗地之秋烈士立功之會也可不助哉

文選此下有云操又矯命稱制遣使發兵恐邊遠州郡過聽而給與彊寇弱主違眾旅叛舉以喪名爲天下笑則明哲不取也卽日幽并青冀四州並進書到荊州使勒見兵與建忠將軍協同聲勢州郡各整戎馬羅落境界舉師揚威並匡社稷則非常之功於是乎著其得操首者封五千戶侯賞錢五千萬部曲偏裨將校諸吏降者勿有所問廣宣恩信班揚符賞布告天下咸使知聖朝有拘偏之難如律令



紹進軍黎陽

刀劒錄表紹在黎陽夢神授一寶刀及覺果在臥所銘曰思召紹解之曰思召紹字也

紹渡河壁延津南

後漢書紹傳注引水經注曰漢孝文時河決酸棗東潰金隄大發卒塞之武帝作瓠子之歌皆謂此口也又東北謂之延津方輿紀要卷四十九延津閘舊在衛輝府新鄉縣東南所謂大河北岸之延津也袁紹以顏良敗於白馬自黎陽渡河追操軍屯延津謂此延津也

太祖還官渡

後漢書紹傳云紹進保陽武方輿紀要卷四十七官渡水在

中牟縣北中牟臺下鴻溝自滎陽下分二渠一爲官渡水又北則爲黃河胡氏謂官渡卽黃河故沮授曰悠悠黃河吾其濟乎案袁紹敗後幅巾渡河則黃河在官渡北矣

紹爲高櫓起土山射營中營中皆蒙楯衆大懼

後漢書紹傳注引獻帝春秋曰紹令軍中各持三尺繩曹操誠擒但當縛之劉攽曰誠當作成

太祖乃爲發石車擊紹樓皆破紹衆號曰霹靂車

後漢書紹傳注卽今之拋車也

注魏氏春秋曰以古有矢石又傳言檣動而鼓說曰檣發石也

說下脫文字

又遣奇兵襲擊紹運車

武帝紀云用荀攸計遣徐晃史渙邀擊大破之曹仁傳仁與史渙等鈔紹運車卽此傳所謂奇兵也

會紹遣淳于瓊等將兵萬餘人北迎運車沮授說紹可遣將蔣奇別爲支軍於表以斷曹公之鈔紹復不從

後漢書紹傳許攸進曰曹操兵少而悉師拒我許下餘守勢必空弱若分遣輕軍星行掩襲許拔則操爲成擒如其未潰可令首尾奔命破之必也紹又不能用會攸家犯法審配收繫之攸不得志遂奔曹操而說使襲淳于瓊等

瓊宿烏巢

水經濟水注濟濱又東逕酸棗縣之烏巢澤澤在酸棗之東南曹太祖破袁紹運處也

紹眾大潰紹與譚單騎退渡河

後漢書紹傳紹與譚等幅巾乘馬與八百騎渡河至黎陽北岸入其將軍蔣義渠營至帳下把其手曰孤以首領相付矣義渠避帳而處之使宣令焉眾聞紹在稍復集

初紹之南也田豐說紹曰

後漢書紹傳曹操畏紹過河乃急擊劉備遂破之紹於是進軍攻許田豐以既失前機不宜便行諫紹不從

紹軍既敗或謂豐曰君必見重豐曰若軍有利吾必全今軍敗吾其死矣紹還謂左右曰吾不用田豐言果爲所笑遂殺之

後漢書紹傳田豐公貌寬而內忌不亮吾忠而吾數以言逆之若勝而喜必能放我戰敗而怨內忌將發若軍出有利當

蒙全耳既敗矣吾不望生水經渠水注又東逕田豐祠北袁  
本初慙不納其言害之時人嘉其誠謀無辜見戮故立祠於  
是用表袁氏覆滅之宜矣

自軍敗後發病七年憂死

後漢書紹傳注引獻帝春秋曰紹爲人政寬百姓德之河北  
士女莫不傷悲市巷揮淚如或喪親袁宇記卷五十五袁紹  
墓在相州臨漳縣西北十六里

審配逢紀與辛評郭圖爭權

後漢書紹傳官渡之敗審配二子爲曹操所禽孟岱與配有  
隙因譖奇言於紹曰配在位專政族大兵彊且二子在南必  
懷反時郭圖辛評亦以爲然紹遂以岱爲監軍代配守鄴

錄紹素意乃奉尙代紹位

後漢書紹傳配等矯紹遺命奉尙爲嗣

注或有議配於紹紹問紀紀稱配天性烈直古人之節不宜疑之

後漢書紹傳紀曰配天性烈直每所言行慕古人之節不以二子在南爲不義也公勿疑之

與太祖相拒於黎陽自二月至九月大戰城下

方輿紀要卷十六袁譚城在大名府滎縣西述征記黎陽城西南七里有袁譚城城西南五里又有一城曹操攻譚時所築潞縣志云袁譚城今呼爲團城又水經濁漳水注曰衡水又北爲袁譚城蓋譚自鄴往還所由濟故得厥名

譚尙敗走入城守

走一作退

乃夜遁追至鄴收其麥拔陰安引軍還許

續郡國志魏郡陰安紹傳云譚尙遁還鄴操進軍尙逆擊破  
操操軍還許

太祖南征荊州軍至西平

續郡國志汝南郡西平

譚尙遂舉兵相攻譚敗奔平原尙攻之急譚遣辛毗詣太祖請  
救

後漢書紹傳譚謂尙曰我鎧甲不精故前爲曹操所敗今操  
軍退人懷歸志及其未濟出兵掩之可令大潰此策不可失

也尙疑而不許既不益兵又不益甲譚大怒郭圖辛評因此  
謂譚曰使先公出將軍爲兄後者皆是審配之所構也譚然  
之遂引兵攻尙戰於外門譚敗乃引兵還南皮別駕王修率  
吏人自青州往救譚譚還欲更攻尙尙自將攻譚譚戰大敗  
嬰城固守尙圍之急譚奔平原而遣辛毗詣操請救注引獻  
帝春秋曰譚保平原尙乃軍於館陶譚擊之敗尙走保險譚  
追攻之尙設奇伏大破譚軍僵屍流血不可勝計譚走還平  
原

注魏氏春秋載劉表遺譚書曰

此所載書辭與後漢書紹傳不同紹傳劉表以書諫譚曰天  
降災害禍難殷流初交殊族卒成同盟使王室震蕩彝倫攸



數是以智達之士莫不痛心入骨傷時人不能相忍也然孤  
與太公志同願等雖楚魏絕邈山河迥遠戮力乃心共獎王  
室使非族不干吾盟異類不絕吾好此孤與太公無貳之所  
致也功績未卒太公殂隕賢胤承統以繼洪業宣奕世之德  
履丕顯之祚摧嚴敵於鄴都揚休烈於朔土廟定疆宇虎視  
河外凡我同盟莫不景附何悟青蠅飛於竿旌無忌游於二  
壘使股肱分成二體向齊經爲異身初承此問尙謂不然定  
聞信來乃知關伯實枕之忿已成棄親卽讐之計已決旃旆  
交於中原暴尸累於城下聞之哽咽若存若亡昔三王五伯  
下及戰國君臣相弑父子相殺兄弟相殘親戚相滅蓋時有  
之然或欲以成王業或欲以定霸功皆所謂逆取順守而微

富彊於一世也未有棄親卽異元其根本而能全於長世者也昔齊襄公報九世之讐士匄卒苟偃之事是故春秋美其義君子稱其信夫伯游之恨於齊未若太公之忿於曹也宣子之臣承業未若仁君之繼統也且君子違難不適讐國交絕不出惡聲況忘先人之讐棄親戚之好而爲萬世之戒遺同盟之恥哉蠻夷戎狄將有誚讓之言況我族類而不痛心邪夫欲立竹帛於當時全宗祀於一世豈宜同生分誦爭校得失乎若冀州有不弟之愆無慚順之節仁君當降志辱身以濟事爲務事定之後使天下平其曲直不亦爲高義邪今仁君見憎於夫人未若鄭莊之於姜氏昆弟之嫌未若重華之於象敖然莊公卒崇大隧之樂象敖終受有鼻之封願捐

棄百病追攝舊義復爲母子昆弟如初今整勒士馬瞻望鶴立

注若齊襄復九世之讐

若乃昔字之譌

注未若文公之忿曹

文公當依紹傳作太公章懷注云言太公者尊之謂紹也

注非疆弱之事爭

事字衍後漢書紹傳注引無

注當唯義是務

義字當依後漢書紹傳注作曹

注事定之後乃議曲直之計

後漢書紹傳計作評是也

注季友歟歟而行鍼叔之鳩

鍼叔後漢書紹傳作叔牙

注先公謂將軍爲兄子將軍謂先公爲叔父

何云觀此則漢末稱本生之親不復系以父母之名矣

注我將軍辭不獲已以及館陶之役

後漢書紹傳載配書校注爲略而此下云伏惟將軍至孝蒸  
蒸發於岐嶷友于之性生於自然章之以聰明行之以敏達  
覽古今之舉措觀興敗之徵符輕榮財於糞土貴名位於邱  
岳何意奄然迷沈墮賢哲之操積怨肆忿取破家之禍翹企  
延頸待望讐敵委慈親於虎狼之牙以逞一朝之志豈不痛

哉與注不同

太祖進軍將攻鄴到洹水去鄴五十里

水經洹水注魏土地記曰鄴城南四十里有安陽城城北有洹水東流者也

依西山來東至陽平亭

續郡國志鄴有平陽城方輿紀要卷四十九平陽城在彰德府臨漳縣西二十五里陽平亭卽平陽也

去鄴十七里臨滏水

續郡國志鄴有滏水劉昭曰魏都賦北臨漳滏則冬夏異沼注云水經鄴西北滏水熱故名滏口

尚亦破走依曲漳爲營

後漢書紹傳漳水之曲

尙還走濫口

水經濁漳水注絳水西出穀遠縣爲濫水又曰漳水又北濫水焉濫水之名以此後漢書紹傳作藍口注云相州安陽縣界有藍嵯山與鄴相近蓋藍山之口方輿紀要卷四十九藍嵯山或謂之祁山諸葛武侯謂曹操危於祁連蓋卽藍口之戰

配兄子榮守東門

後漢書紹傳榮爲東門校尉

注配曰不知也曰自卿文榮耳

文字何氏校改作子是也

注公復謂曰曩日孤之行圍何弩之多也配曰恨其少耳

後漢書紹傳審配令士卒曰堅守死戰操軍疲矣幽州方至何憂無主操出行圍配伏弩射之幾中

譚乃拔平原并南皮自屯龍湊

方輿紀要卷三十一龍湊城在德州東北蓋河津置戍處何氏曰在平原勃海間爲河津要口

譚不出夜遁奔南皮臨清河而屯十年正月攻拔之斬譚及圖等

寰宇記卷六十五滄州南皮縣有曹公固卽漢京兆尹雋不疑葬所魏太祖因冢爲固以攻袁氏因爲曹公固焉又縣東有觀臺袁譚所築魏武擒譚於此紹傳云操急攻之譚欲出

戰軍未合而破譚被髮驅馳追者意非恆人趨奔之譚墮馬  
顙曰咄兒過我我能富貴汝言未絕口頭已斷地於是斬郭  
圖等戮其妻子

上洛都尉捕斬之

方輿紀要卷五十四商州上洛廢縣漢末以縣在武關峽關  
之間置上洛都尉

注尚寒求席熙曰頭顙方行萬里何席之爲

後漢書紹傳是公孫康語

注熙字顯奕

後漢書紹傳熙字顯雍

後爲折衝校尉虎賁中郎將



後漢書袁術傳累遷至河南尹虎賁中郎將靈帝紀張讓等殺何進虎賁中郎將袁術燒東西宮攻諸宦者又何進傳進被害宮閣間袁術與吳匡共斫攻之因燒南宮九龍門及東西宮欲以脅出讓等

會長沙太守孫堅殺南陽太守張谷術得據其郡

後漢書術傳劉表上術爲南陽太守水經洛水注曰合水東北流注於公路澗世俗音譌號光祿澗非也上有袁術固四周絕澗迢遠百仞廣四五里有一水淵而不流故谿澗卽其名也又曰九山谿水北逕袁公塢東蓋公路始固有此也故有袁公之名矣寰宇記卷五袁術固一名袁術塢在河南緱氏縣西南十五里四面絕澗甚險宋武北征記云少室西山

有袁術固可容十萬人一夫守隘千人莫當又有公路壘公路澗在縣西南三里

術以餘眾奔九江殺揚州刺史陳溫領其州

後漢書術傳術兼稱徐州伯續郡國志汝南項注有公路城水經潁水注潁水東側有公路城汝水別瀆又東逕公路臺北皆袁術所築也

注術退保陰陵

續郡國志九江郡陰陵

注瑀懼走歸下邳如此則溫不爲術所殺與本傳不同

後漢書獻帝紀初平四年三月袁術殺揚州刺史陳溫據淮南術傳亦云殺揚州刺史陳溫而自領之又陳球傳子瑀吳

郡太守注引謝承書曰瑀與孝廉辟公府洛陽市長後辟太尉府未到永漢元年就拜議郎遷吳郡太守不之官一清案孫策傳注引江表傳建安二年敕孫策與呂布及行吳郡太守安東將軍陳瑀同討袁術而瑀陰圖襲策策攻瑀於海西大破之則不得云不之官也

注獻帝春秋曰術從日磾借節觀之因奪不還備軍中千餘人備字何氏從通鑑校改作條是也

時沛相下邳陳珪

後漢書陳珪傳注引謝承書珪字漢瑜舉孝廉劇令去官舉茂才濟北相魏書地形志下邳郡歸正縣有陳珪墓在今南邳州境

術嘿然不悅用河內張炯之符命遂僭號

後漢書獻帝紀建安二年春袁術自稱天子九月殺陳王寵  
陳敬王羨傳議兵起寵率眾屯陽夏自稱輔漢大將軍袁術  
遣客詐殺國相賈後及寵寔字記卷十六泗州招信縣本漢  
淮陵縣有公路城在縣北六十里袁術僭號九江率兵擊殺  
陳王寵曹操征之術渡江築此城以自據

注乃建號稱仲氏

後漢書術傳自稱仲氏注云仲或作冲

荒侈恣甚

後漢書楊彪傳注引華嶠書曰東京楊氏袁氏累世宰相爲  
漢名族然袁氏車馬衣服極爲奢僭能守家風爲世所貴不

及楊氏也

術前爲呂布所破後爲太祖所敗

後漢書術傳遣使以竊號告呂布并爲子聘布女布執術使  
送許術大怒遣其將張勳橋蕤攻布大敗而還術又率兵擊  
陳國誘殺其王寵及相駱俊曹操乃自征之術聞大駭卽走  
渡淮畱張勳橋蕤於蘄陽以拒操操破斬蕤勳退走術兵弱  
大將死眾情離叛

奔其部曲雷薄陳蘭於潯山

後漢書術傳作陳簡

欲至青州從袁譚

水經淮水注淮陰城西二里有公路浦袁術將東奔袁譚路

出斯浦因以爲名

發病道死

後漢書獻帝紀建安四年六月袁術死

劉表字景升山陽高平人也

後漢書劉表傳云魯共王之後也

注漢未名士錄云表與汝南陳翔字仲麟范滂字孟博魯國孔  
昱字世元勃海苑康字仲真山陽檀敷字文友張儉字元節南  
陽岑暉字公孝爲八友

七人後漢書俱有傳皆不及當塗之難唯張儉以年高見徵  
儉傳云建安初徵爲衛尉不得已而起儉見曹氏世德已萌  
乃閤門懸車不像政事歲餘卒於許下年八十四

以大將軍掾爲北軍中候

續百官志北軍中候一人六百石掌監五營

是時山東兵起表亦合兵軍襄陽

方輿紀要卷七十九卷八十後漢荊州刺史治漢壽常德府城東西十里有漢壽城初平二年劉表爲荊州徙治襄陽水經沔水下注水南有層臺號景升臺蓋劉表治襄陽之所築也表盛遊於此常所止憩表性好鷹嘗登此臺歌野鷹來曲其聲韻似孟達上堵吟矣

注司馬彪戰略曰劉表之初爲荊州也江南宗賊盛

何云賓者南蠻之名宗賊疑即蠻賊後漢書注則云宗黨其爲賊

注表初到單馬入宜城而延中廬人蒯良蒯越襄陽人蔡瑁與謀

襄陽耆舊傳蔡瑁字德珪襄陽人性豪自喜少爲魏武所親劉琮之敗武帝造其家人瑁私宅呼見其妻子謂曰德珪故憶往昔共見梁孟星孟星不見人時否聞今在此那得面目見卿邪瑁家在蔡洲上屋宇甚好四牆皆以青石結角婢妾數百人別業四五十處漢末諸蔡最盛水經沔水注沔水東南逕蔡洲漢長水校尉蔡瑁居之故名南有蔡瑁冢冢前刻石爲大鹿狀甚大頭高九尺制作甚工

注兵集眾附南據江陵北守襄陽荊州八郡

後漢書表傳注引漢官儀曰荊州管長沙零陵桂陽南陽江



夏武陵南郡章陵等是也一清案續郡國志荊州只是七郡而無章陵疑是漢末立下文裴注云詔書拜蒯越爲章陵太守是也曹魏因之故趙儼亦爲章陵太守然魏武志云建安二年南陽章陵諸縣復叛爲編則其時尚未爲郡當在是年之後

注英雄記曰州界羣寇既盡表乃開立學官博求儒士使蒯母闔宋忠等撰五經章句謂之後定

隋書經籍志周易五卷漢荊州劉表章句梁有荊州五業從事宋忠注周易七卷亡又有新定禮一卷後漢書儒林傳穎容字子嚴陳國長平人博學多通善春秋左氏初平中避亂荊州聚徒千餘人劉表以爲武陵太守不肯起箸春秋左氏

條例五萬餘言晉書天文志雜星氣條云劉表命武陵太守  
劉劭集天文眾占曰荊州占何云喪亂中經籍不遂泯絕實  
賴有此非可以表無遠略嗤爲不急

注傳子曰翼字公悌

隋書經籍志魏尚書傳翼集一卷錄一卷

建安十三年太祖征表未至表病死

後漢書表傳疽發背卒

琦與琮遂爲讐隙

後漢書表傳表初以琦貌類於已甚愛之後爲琮娶其後妻  
蔡氏之姪蔡氏遂愛琮而惡琦毀譽之言日聞於表表寵就  
後妻每信受焉又妻弟蔡瑁及外甥張允並得幸於表又睦

於琮遂以琮爲嗣琮以侯印授琦琦怒投之地將因奔喪作難會曹操軍至新野琦走江南一清案輿論稱琦性慈孝且表之亡也南上已危靈曜爲譚尙之爭乎作難之言似未足據也又案表尙有小子名脩字季緒見陳思王傳注

太祖軍到襄陽琮舉州降

水經沔水注宜城縣有太山建安三年崩聲聞五六十里雉皆屋雊縣人惡之以問侍中龐季季云山崩川竭國土將亡之占也十三年魏武平荊州沔南彫散

注太祖平荊州以涿郡李立字建賢爲荊州刺史

方輿紀要卷七十九格壘在襄陽穀城縣南十二里岡上舊志岡東臨漢水漢末劉表將李氏甚富有奴僕數百立壘保

此一清案李氏疑卽立也

注詔書拜章陵太守

章陵故春陵本南陽之屬縣也續志有晉宋志無方輿紀要  
曹魏時省入蔡陽此云章陵太守蓋後漢嘗立爲郡章帝元  
和元年和帝永和十五年桓帝延熹七年俱幸章陵蒯越作  
守則建安時猶有此郡故武紀建安二年書南陽章陵詣縣  
復叛爲繡其後又以趙嚴爲章陵太守嗣後無聞則郡縣皆  
廢省矣

注先賢行狀曰嵩字德高義陽人

方輿紀要卷五十義陽城在河南信陽州南四十里漢南陽  
郡平氏縣之義陽鄉也魏文帝置縣屬義陽郡據此則魏末

已有義陽縣

注表郊祀天地嵩正諫不從

後漢書孔融傳荊州牧劉表不供職貢多行僭偽遂乃郊祀  
天地擬斥乘輿詔書班下其事融上疏宜且諱之以崇國防  
管書劉弘傳劉景升以禮樂崩壞命杜夔爲天子合樂樂成  
欲庭作之夔曰爲天子合樂而庭作之恐非將軍本意事亦  
見杜夔傳

義侍中

義章陵人

注零陵先賢傳曰

隋書經籍志有零陵先賢傳一卷

其餘多至大官

後漢書竇武傳武孫輔年二歲曹節等捕之急武府掾桂陽胡騰及令史南陽張敞共逃輔於零陵界詐云已死騰以爲己子而使聘娶焉後舉桂陽孝廉建安中劉表辟爲從事使還竇姓以事列上會表卒曹操定荊州輔與宗人徙居於鄴辟丞相府從征馬超爲流矢所中死

注世語曰表死後八十餘年至晉太康中表冢見發表及妻身形如生芬香聞數里

水經沔水注襄陽城東門外二百步劉表墓今墳冢祠堂猶高顯整頓方輿紀要劉表墓在高平郡表卒備蘇合消數十斛置棺中永嘉中郡人發其墓香聞數十里

跨蹈漢南紹鷹揚河朔

跨蹈上疑脫表字

三國志注補卷六

宿松羅忠濟初校

黟縣黃士陵覆校

陽湖吳朝寅再覆校